



Maria Catrina Caduff (seniester) gioga la rolla da Sinaide, dalla dunna da Pharao.

FOTOS G. VENZIN



Sep Fidel Nay da Sursaissa ei in dils numerus commembers dil Coro Opera Viva.

Fuigia sur la mar

Oz ei premiera dalla oper Moses a Sursaissa

■ (gv) **Moses retscheiva da Diu il camond da liberar il pievel hebreic dalla sclavaria e menar el dalla Egipta en Israel.** Gioacchino Rossini ha scret l'opera «Mosè in Egitto» che ha giu premiera igl onn 1818 el Teatro San Carlo a Napoli. Premiera dat era la Compagnia Rossini ensemen cul Coro Opera Viva ed igl orchester Giuseppe Verdi da Budapest questa sera a Sursaissa culla opera «Moses». Rodund miez onn ein solists, chor e orchester sepreparai per quei punct culminont cultural en Surselva. «Tut ei iu uonn empau pli tgunsch», ha il directur musical e dirigent *Gion Gieri Tuor* da Sursaissa manegiau. Tut ei iu pli tgunsch suenter la presentaziun gartegia da digl onn vargau. Cun «I Lombardi» da Giuseppe Verdi haveva l'Opera Viva dau l'entschatta e «Moses» ei la successiun. Ils protagonistis ein ils medems, era chor ed orchester han fatg igl onn vargau experienschas ella tenda a Sursaissa. Niev, mo tuttina enconuschent, ei il maletg dalla culissa creaus digl artist indigen Rudolf Mirer. Era uonn fa quei maletg parada ed accentuescha ensemen cun ils cuostums creai da *Sylvie Capeder* l'inscenaziun dirigida dil reschissur *René Schnoz* da Mustér.

Armin Caduff, il maestro dalla Compagnia Rossini gioga la rolla da Moses. Igl ei ina rolla da parada pigl ambassadur dalla musica e dil Grischun. Parada fa era siu fegl *Flurin* ella rolla da Pharao. Ensemen cun sia consorta Sinaide (*Maria Catrina Caduff*) e suita inspectescha el las lavurs vid la piramida. Ils Hebres vulan discutir cun el dalla relaschada dalla sclavaria. Pharao empermetta a Moses da relaschar siu pievel en libertad sch'il Diu dils Hebres detti in segn da sia existenza. Moses aulza siu fest miraculus viers tschiel. Il sulegl sestgirenta. Pharao tegndenton buca sia empermischun e fa luvrar ils Hebres vinavon vid la piramida. Moses interrompa las festivitads dils Egipts e fa reproschas a Pharao. Ei dat ina dispeta. In niev segn da Diu lai sballunar il tempel. Alla fin anflan ils Hebres la via ella libertad sur la mar.

L'opera presentada nov gadas ella tenda a Sursaissa ei plein dramaturgia. Las rollas principalas giogan e contan *Armin Caduff*, *Cornelia Cathomen* da Breil, *Xenia Halon* da Sedrun, *Anica Defuns* da Sedrun a Zug, *Flurin Caduff* e *Maria Catrina Caduff* da Danis ed il tenor *Mihajlo Arsenki* dalla Macedonia ella rolla Amenofi sco fegl da Pharao.

Ella opera Moses ei Mihajlo Arsenki il fegl dil Pharao. La sopranista Anica Defuns ei Anaide.



Culissa e costums ein vegni creai dils dus artists Rudolf Mirer e Sylvie Capeder e dattan alla inscenaziun da René Schnoz temprà.